



# Gutpela Wasman

No 5/2018

**Jisas Krai i tok,  
“Mi gutpela wasman  
bilong sipsip.”**

Jon 10.11

## Presen bilong laikim tru em Jisas


### Jisas i laikim wanem samting long yumi?

Tupela papamama i gat wanpela liklik gel i stap, na tupela i gat planti mani samting. Planti taim tupela papamama i save go aut long arapela kantri na larim liklik gel i stap wantaim bebi sita long haus. Wanwan taim tasol gel i save lukim papa na mama bilong em taim tupela i kam bek long haus.

Wanpela taim mama bilong liklik gel i salim wanpela presen i kam long em. Insait long bokis i gat wanpela naispela samting long pilai i stap. Mama i bin baim dispela toi long bikpela mani tru. Taim liklik gel i lukim dispela presen em i les tru long opim dispela bokis. Em i tromoi dispela presen i go daun long graun na toi i bruk. Liklik gel i stat long krai na i tok, “O mama, yu

no ken salim ol naispela samting tasol long mi. Mi laikim yu. Mi laikim yu long stap klostu wantaim mi.” Gel i tok olsem na em i krai longpela taim tru.

Jisas i no laikim ol samting bilong graun yumi givim long em. Jisas i laikim yumi pikinini long givim laip bilong yumi olgeta long God. Em i no laikim yumi givim sampela presen tasol long em. Nogat. Olsem wanem bai yumi pikinini i givim yumi yet olgeta long God? Yumi mas bilip long dai bilong Jisas antap long diwai kros long sin bilong yumi. Em i lusim laip bilong em long kisim bek yumi ol pikinini. Yumi laik larim Jisas i stap bikpela insait long laip bilong yumi. Yumi laik givim yumi yet olgeta long God na bihainim em wanpela tasol. Em i laik yumi bihainim gut olgeta tok bilong em.



## Presen bilong laikim tru

Sampela taim i go pinis, wanpela pren bilong mi i bin panisim liklik pikinini gel bilong em long westim wanpela pepa rol bilong pasim gol. Papa i nogat inap mani olsem na em i kros taim em i lukim pikinini gel i bagarapim pepa bilong bilasim gut wanpela bokis long putim aninit long krismas diwai.


Long moning liklik gel i bin bringim dispela bokis papa i bin toktok planti long en i kam long em na i tok, “Papa, dispela em i presen bilong yu.” Nau papa i sem long em i krosim gel bilong en. Isi isi papa i opim presen bokis na lukim olsem presen bilong en, em i wanpela emti bokis nating tasol. Nogat wanpela samting i stap insait long bokis. Belhat i kirap gen na papa i singaut bikmaus na krosim pikinini gel bilong em na tok, “Yu no save olsem sapos yu givim presen long wanpela man, i mas i gat sampela samting i stap insait?”

Liklik gel i lukluk stret long pes bilong papa wantaim aiwara na tok olsem, “O Papa, em i no emti bokis nating. Mi pulmapim bokis wantaim kis na laikim bilong mi. Em olgeta bilong yu papa tasol.” Nau papa i nogat tok moa, em i sori tru na holim pasim gel bilong en na askim em long lusim rong bilong en. Bihain papa i tokim gel olsem, “Mi bai lukautim gut dispela bokis long rum bilong mi na taim mi lukim bokis mi bai tingim laikim bilong pikinini gel bilong mi olsem em i stap klostu wantaim mi.”



Long wanpela save tru i olsem, wanwan pikinini i bin givim pinis wanpela botol gol i pulap long laikim tru i go long papamama bilong ol. Dispela i winim tru ol arapela samting ol i save givim long papamama. God i no laikim yumi long tok tasol na wokim emti promis. Nogat. Em i laikim yumi tru wantaim bel na i givim yumi wanpela pikinini bilong em olsem presen tru bilong yumi.

Olsem wanem long yumi nau? Yumi bai givim laip bilong yumi olgeta i go long God olsem presen tru o yumi wokim emti promis na laikim em long maus tasol. Jisas i bin givim laip bilong en olgeta long yumi. God i laik yumi tu i mas givim laip bilong yumi olgeta i go long em.



# Presen

Wanpela Krismas moning em i taim bilong opim ol presen. Ol pikinini i amamas tru na i laik luksave wanem samting i stap insait long ol presen bilong ol. Na taim ol i opim ol i mekim planti pipia insait long rum. Nau em i taim bilong mipela ol papamama long opim ol presen bilong mipela. Mipela i mas larim ol pikinini i mas rispektim mipela na i stap isi.

Meri bilong mi Brenda na ol famili bilong en ol i gat wanpela kastom o pasin bilong givim ol pani (funny) presen i go kam. Dispela i no save givim bel isi long mi long taim bilong Krismas

Pikinini gel bilong mi Kristi i gat 6-pela krismas. Em i sanap stret long pes bilong mi na i helpim mi long opim ol presen bilong mi. Taim mi laik opim las presen bilong mi, mi tingim pinis olsem em i wanpela pani presen. Na taim olgeta lain i lukluk i stap, mi opim dispela presen na mi ting sapos ol i lap em i orait.

Insait long dispela presen, i gat wanpela balus long pilai i stap na ol manmeri i lap. Mi no bin lukim nem bilong husat i bin salim i kam. Bihain mi kisim pepa na ritim nem bilong husat i bin salim dispela presen i kam. Ol i raitim, “Bilong papa, laikim yu Kristi.”




Kristi i kisim mani bilong em yet na baim Krismas presen bilong papa bilong em. Em i save lukim mi pilai komputa gem wantaim balus na em i baim toi balus bilong mi.

Mi brukim skru na holim pas gel bilong mi. Mi kisim toi balus na mi mekim nois bilong balus i plai na mi mekim kain kain inap Kristi i ken amamas na smail. Tru tumas mi bin mekim inap smail bilong Kristi i kam bek. Mi no givap, mi wok long pilai wantaim toi bilong mi na olgeta ol arapela pikinini i lusim presen bilong ol na kam long mi na i laik lukim mi. Nau Kristi i smail na lap. Mi holim yet dispela toi bikos em i kam long gel bilong mi na em i givim wantaim laikim na bel.



Jisas i bin wanpela bikpela presen bilong yumi olgeta. Yumi pikinini i holim yet Jisas olsem papa i holim yet toi balus bilong liklik gel bilong en?



# Pasel Taim


Yu ken ritim ol askim aninit na raitim ansa long ol bokis aninit.

## Daun

1. Wanem as na Jisas i dai long diwai kros?
2. Liklik gel i givim wanem presen long papa?
3. Liklik gel i lukluk stret long pes bilong papa wantaim...


## Across

1. Kristi i gat hamas krismas?
4. Mama i baim wanem kain presen bilong gel bilong en?
5. God i givim wanem presen long yumi?



*Dispela  
presen God i bin givim yumi,  
em i bikpela moa, na yumi no inap  
autim gut olgeta tok bilong en. Yumi mas  
tenkyu long God long dispela presen  
2 Korin 9.15*

Ol stori i kam long dispela tupela buk, "More Little Visits With God" na "Stories for the Heart". Translated by Guwa team



Published and printed by:  
Publications Department  
Evangelical Brotherhood Church (Inc.)  
P.O. Box 996, Lae 411, Papua New Guinea

No 5/2018

